

Nā Hanana o ka Mokuna 2



Hanana 2.1: Oihana Kālepa Hawai'i

ʻŌlelo Mua:

Ma Hawai'i, i ka wā kahiko, 'o ke kālepa 'ana ka hana e kū'ai aku kū'ai mai ai nā mea. I kēia wā, loa'a ke kālā ma ke 'ano he **kūlana pa'a** e uku ai, mau nō na'e ke kālepa 'ana i kēia mau lā. Kālepa aku kālepa mai nā haumāna i nā kāleka, nā pogs, nā mea pā'ani, a me nā mea i loko o ka pā'ani wikiō. He kōkua kēia mana'o 'o ke kālepa i ka maopopo i ka waiwai o kekahi mea a me ke kālepa kūpono 'ana.

Nā Pono Hana:

1. Kāleka Pahu (4 a 5 o ka haumāna a i 'ole ka hui)
2. Nā penikala, peni kuni waiho'olu'u



Hana:





E no'ono'o mai, kohu mea lā aia nō 'oe ma Hawai'i i ka wā kahiko loa a ua makemake e mālama i kekahi lū'au no ka 'ohana me nā hoaaloa. Noho kou 'ohana ma kai a 'eleu lākou ma ka lawai'a a makemake na'e e loa'a pū nā pua'a no ka po'e kipa mai no laila, 'imi 'oe i ke kanaka hahai holoholona. 'Ōlelo mai ke kanaka, "E hā'awi au iā 'oe 1 pua'a me 5 kalo no 2 i'a." 'Ae 'oe a māka 'ia kēia kālepa 'ana ma luna o kekahi 'āpana kapa.

Ma ka hō'ea i ka hale no ka ho'omākaukau i nā i'a no ke kālepa 'ana, ua 'ike i ka nui kānaka e hele mai ana i ka pā'ina a 'a'ole nō 'oe i mana'o pēlā no laila, ho'i aku 'oe i ke kanaka hahai holoholona a 'ae 'o ia he 3 pua'a me 5 kalo no 5 i'a. Māka 'ia kēia kekahi. Mana'o 'oe, ua maika'i loa kēia a ho'i 'oe i kou hale no ka ho'omākaukau i nā i'a.

Ha'i maila kou makuahine e 'oi loa aku ana ka nui po'e e hō'ea mai ana i ka pā'ina no laila, ho'i hou 'oe i ke kanaka hahai holoholona a 'ae 'o ia he 7 pua'a me 5 kalo no 14 i'a. Ua mana'o 'oe, ua pa'a nā mea e pono ai a ho'i i ka hale. Eia kā, he 4 wale pua'a e pono ai ma muli o ke kāpae 'ia o ka hō'ea mai o kekahi mau kānaka i ka pā'ina.

I 'ole e ho'opau manawa ma ka hele hou a wala'au me ke kanaka hahai holoholona, lawe pū 'oe i nā i'a i lawa no ke kālepa. E hō'ulu'ulu pū kākou i ka 'ike pili a hō'ike ma kekahi mau kāleka pahu.





Mai kēia mau kāleka, hiki ke kuapo 1 pua'a no 2 i'a 'oiai, pālua 'ia ka nui i'a no ho'okahi pua'a no laila, inā makemake 4 pua'a, pono e hā'awi aku i 8 i'a i ke kanaka hahai holoholona. E loa'a ana 5 kalo keu kekahi!

E haku 'oe i kekahi hana no kou mau hoapapa e hana ai, e kuhi ai lākou i ka waiwai pono no ke kālepa kūpono. 'A'ole pono ka pua'a me ka i'a, nāu nō e haku. E kuhi 'oe i ka mana'o o nā hoapapa no ka waiwai o nā mea. A laila, e no'ono'o ho'i, 'o wai ka hoapapa kūpono loa e lālepa pū ai.

Hanana 2.2: Ka Mākoī a me Ke Ko‘a

‘Ōlelo Mua:


He pilina ikaika loa ko nā kānaka Hawai‘i me ka wai a me ke kai. Mālama nui lākou i ka wai ‘oiai, mālama pū mai ka wai i nā kānaka. He mau i‘a ka hapanui o ka ‘i‘o ma ka ‘ai Hawai‘i. Akamai nā Hawai‘i i ka lawai‘a ‘ana. Ma kēia hana, e hana kākou i kekahi mākoī.

Nā Pono Hana:


1. He ‘āpana lā‘au, ma kahi o 5 kapua‘i u ka lō‘ihi
2. He kaula, ma kahi o 12 kapua‘i ka lō‘ihi
3. Ka leki (*duct* a i ‘ole *masking*)

Hana:

E nāki‘i i ka hīpu‘u penei (ma lalo) no ka ho‘opa‘a i kekahi wēlau o ke kaula a i ke kumu (‘au) o ka ‘āpana lā‘au.




A laila, e wili i ke kaula mai ke kumu (‘au) a ka wēlau o ka lā‘au a koe 4 a 5 paha kapua‘i kaula ma ka wēlau o ka ‘āpana lā‘au. E ho‘opa‘a i ke kaula ma ka wēlau o ka ‘āpana lā‘au me ka hīpu‘u like, (aia nō ma luna). Pono e pa‘a kūpono ke kaula i wili ‘ia ma ka mākoī. Inā ‘a‘ole i pa‘a kūpono, e wili hou i ke kaula a ‘oi aku ka pa‘a a e leki i nā hīpu‘u i ‘ole e hemo.



‘O ka hope, e leki i kekahi wēlau o ke kaula a hana i “lihi” i ‘oi aku kona nui pa‘a.

Hiki i ka lawai'a mākaukau ke kā'ili i ka makau ma ke kai lawai'a me ka ma'alahi. 'O ia ho'i, 'a'ole i pa'a a i 'ole i moku ke aho. 'A'ole ho'i e hihia ke aho me kekahi aho 'ē a'e.


Me kēia hanana, e ho'oka'awale mua i nā haumāna a 'elua a 'oi kime. A laila, e māka ke kumu i kekahi māhele o ka papahale he **Kai Lawai'a** a i kekahi māhele 'ē a'e o ka papahale he **Wahi Kā'ili**.



Pono nā haumāna a pau e kā'ili aku i ke aho mai loko aku o ka Wahi Kā'ili. Ke 'ōlelo ke kumu e ho'omaka, e kā'ili aku nā haumāna i nā kaula i ke Kai Lawai'a. A hala '**elima kekona**, pono nā haumāna a pau e waiho i nā mākoī ma ka papahale. Lilo ka 'ai i kekahi kime ke:

1. komo kekahi lihi i loko o ke kai lawai'a **a**
2. hihia 'ole ke aho me kekahi aho.

Eia ka la'ana!



Ma ke ki'i o luna, ua lilo 2 'ai i ke kime **▲** a 'a'ohe 'ai i ke kime **■** no kēia puni.

E pā'ani no kekahi mau puni a lanakila kekahi kime.

